

**JOSÉ LUIS GARCÍA GARCÍA**  
(Bustiello, Asturias, 1941 – Madrid, 2020)

El coronavirus que nesti 2020 s'esparde per toa Europa terminó cola vida del antropólogu asturianu José Luis García García, que morrió'l pasáu día 28 de marzu en Madrid, ciudá onde vivía. José Luis García, que naciera en Bustiello, en conceyu de Mieres, nel añu 1941, fuera profesor na Universidá Complutense de Madrid y dirixera a lo llargo de dellos años la *Revista de Antropología Social* (RAS), espublizada pola mesma Universidá Complutense.




Cuando'l panorama de l'antropoloxía cultural y social yera ermu por demás, asoleyóse la so obra *Antropología del territorio*, en 1976. Nesti llibru, dempués d'una esposición teórica en cuantes a la perceición social y al discursu semánticu del territoriu y del hábitat, estúdiense dos comunidaes asturianas: per un llau, Bustiello, pueblu de nacencia del autor y, per otru, Vilanova d'Ozcos. Esta publicación, que yera una novedá non solo nos ámbitos académicos sinón nel mundu de les llibreríes en xeneral, venía con unes nueves propuestes metodolóxicques y yera l'entamu d'una trayectoria llarga en llibros y artículos d'antropoloxía social. Llevantó en munchos de nós simpatía abonda y esperanza d'atopar nuevos senderos na investigación antropolóxica. Bien d'años más tarde, José

Luis García volvió al territoriu de Bustiello en 2013 col artículu «La utilización, reutilización y patrimonialización de la cultura en los procesos de intervención social», espublizáu precisamente nel volume número 22 de la *Revista de Antropología Social*.

Otra obra con bien de valir ye la que nel añu 1991 asoleyó'l Ministeriu de Cultura, un llibru coleutivu col títulu *El proceso ritual. Estudio comparativo en cinco zonas españolas*, onde José Luis García, que tamién presidiera l'Asociación Madrileña d'Antropoloxía, tuvo'l papel más destacáu.

La so trayectoria d'investigador anduvo per dixebrades estayes y con distintos oxetivos, siendo ún de los más interesantes el conxuntu d'investigaciones antropolóxicques sobre la minería asturiana y el mundu que siguió a la crisis y la conversión de les cuenques nun espaciu enllenu de prexubilaciones y xubilaciones. Nesti sen tenemos los llibros *Prácticas Paternalistas. Un estudio antropológico sobre los mineros asturianos* (1996) y *Los últimos mineros: un estudio antropológico sobre la minería en España* (2002). Tocante a esti tema tenemos tamién artículos y trabayos, n'obres coleutives o revistes, fechos pol propiu José Luis García, como ye'l casu de «Caminos a ninguna parte. Un análisis de las prejubilaciones en la minería asturiana, desde los registros del tiempo» (2007) o «La categorización de las relaciones de género en el contexto de la mina y de las prejubilaciones» (2008).




José Luis García estudiara Filosofía y Lletres n'Alemaña y dempués volvió a Madrid, onde collaboró nes investigaciones de Luis Cencillo. Entrambos, Luis Cencillo y José Luis García, espublizaren en 1973 *Antropología cultural*

y *psicología y Antropología cultural: Factores psíquicos de la cultura* en 1976. L'antropólogu asturianu tuvo'l méritu de separtase d'un psicologismu confusu y a partir d'esi momentu iguó, entamando cola yá citada *Antropología del territorio*, una obra de valir evidente pa l'antropoloxía.

José Luis García espublizó nel númberu 23 de la revista *Lletres Asturianas*, boletín oficial de l'Academia de la Llingua Asturiana, l'artículu «El discurso del nativo sobre su propia cultura. Análisis de un concejo asturiano», que yera tamién el títulu de la ponencia cola que participara nes *V Xornaes d'Estudiu* que llevaben el títulu xeneral d'*Antropoloxía, Etnoloxía y Llingua* y que la mesma Academia fixera nel mes d'ochobre del añu 1986.

Conocí a José Luis García en distintos alcuentros d'antropólogos. La primer vez que tuví contautu cercanu con él foi pel branu del añu 1995, en Santiago de Compostela, onde participemos nun conceyu de «Linguas e identidades», entamáu pol antropólogu gallegu Xaquín Rodríguez Campos, de la Universidá de Santiago. José Luis García intervieno con una ponencia bien interesante (*La utilización diferencial del lenguaje en distintos contextos de identidad*) na que se centraba nes esperiencias na cuenca minera asturiana, onde ye frecuente romper dellos convencionalismos llingüísticos y l'usu d'espresiones que sedrén tabús n'otros ámbitos (blasfemies, insultos). Tamién observaba cómo ente los mineros va iguándose un repertoriu llingüísticu que, afitándose nel asturianu xeneral, tien unos conteníos específicos nel mundu de la mina. A l'alcordanza de los aspectos científicos axúntase'l fechu de que mientres nos llevaben en coche per Santiago tuvimos un



accidente de tráficu nel qu'entrambos quedemos mui asustaos, aunque ensin mancadura grave dengunu. Esti acontecimientu accidental ayuda a que m'alcuerde de que la impresión que me dio José Luis García fuera la d'un estudiosu seriu, trabayador, intelixente y, humanamente, cercanu. Conocí tamién la so hestoria familiar: él yera una víctima de los accidentes mineros, pola muerte del so pá nún d'ellos.

La segunda vez que tuvi más contautu con esti antropólogu asturianu fuera un añu más tarde, pela seronda de 1996, en Zaragoza, onde se celebró'l VII Conceyu d'Antropoloxía Social de la Federación d'Asociaciones d'Antropoloxía del Estáu Español. Participé yo con una ponencia titulada *El papel de la lengua en la identidad étnica*, que taba dientro de la estaya *Etnolingüística y análisis del discursu*. José Luis García yera l'encargáu de dirixir y coordinar esta estaya de trabayu y alcuérdome perfeutamente de lo bien que conduxo los debates y la forma escelente na que curió la edición que dempués se fixo de los conteníos d'aquella estaya de trabayu.

Per setiembre del añu 1999 tuvi la ocasión de tratar otra vuelta pesonalmente con José Luis García, tamién en Santiago de Compostela, sobre cuestiones d'antropoloxía asturiana. Yera nel VIII Congresu d'Antropoloxía de la Federación d'Asociaciones d'Antropoloxía del Estáu Español. Yo participara na estaya de *Llingües, identidaes ya ideoloxíes* falando de *Lengua, conflicto e ideología* y, aunque José Luis taba n'otra estaya distinta, nun dexé d'asistir a la so comunicación *Los mineros asturianos: la realidad de una invención*, que m'interesó muncho.

Persábase la desgraciada situación de los estudios antropolóxicos dende les instituciones asturianas, situación infeliz que se manifestó de la forma más dramática nel vetu que torgó les posibilidaes d'estudiar científicamente la cultura asturiana na Universidá d'Uviéu. Persabemos que se perdió una gran oportunidá d'afondar na cultura d'un de los territorios europeos más ricos d'Europa nesi sen. Persentimos que se perdiera una oportunidá que yá pasó y que nun volverá: naquellos años decisivos de tresformación de la cultura astur y del so desanicu yera cuando pudo entamase la formación d'antropólogos asturianos que llavaren el trabayu d'investigación grande, ampliu, diversu y poderosu qu'Asturies merecía. Por ello agradezse contar cola obra d'antropólogos como José Luis García que, institucionalmente dende fuera, punxeron los sos güeyos na sociedá y na cultura asturiana.

*Roberto González-Quevedo*  
*Marzu, 2020*